

2 TESALONIKA NE

Paulom dis tcgāyas cām di sa

Tesalonika ne koe

Téé-cookg'ai sa

Khòe ne kerekes Tesalonika koe hānas di nea kò kái zi tēè zi úúa hāa Jesom di kabisean ka. C'ēe nea kò Jeso ba nxāakamaga kabisea hāas ka dtcòmā hāa.

Paulo ba kò ncēm tc'ēe ba qāèse nxāea kg'ónò, a ko máá, Krestem qanega hàà tama cookg'ai koes gha ntcoeku sa tēe, me gha khòèm x'áèan komsana tama ba x'áise. I gha cg'āè cauan hēé naka x'áèan úú taman hēéthēé càuse. Paulo ba kò gam di nxará-kg'aoan x'áè, gane di dtcòmān koe ne gha qarika téé sa, qóman hēé naka xháèan hēéthēé di zi x'aè zi ka. Gatagam ko dtcàrà ne, kg'òè sa ne gha tsééa máá sa, Paulom ma gam di ne tséé-kg'ao ne cgoa hēéa khama.

Qaa-qaasa kg'uia ne:

- cg'āè, x'áèan úú tama sa

Tcgāyas q'oo koe hàna zi:

- Paulo ba ko dtcòm-kg'ao ne dqom̄ (1)

- Krestem di hàan ka (2)

- Paulo ba ko dtcòm-kg'ao ne dtcàrà, kg'òèa ne ne gha tsééa máá sa (3)

Paulo ba ko dtcòm-kg'ao ne dqòm (1)

Tsgámkaguku zi

1 ¹Tíí Paulo ra hěé, naka Silefano^a ba hěé, naka Timoteo ba hěéthěé

xae ko *ncěes tçgāya sa* Tesalonika dis kerekes, ncěe Nqarim gatá ka Xòò ba hěé naka X'aigam Jeso Krete ba hěéthěé tsara koe hāa sa góá máá

²a ko máá: Nqarim gatá ka Xòò ba hěé naka X'aigam Jeso Krete ba hěéthěé tsara koe guua hāa cgòmkuan hěé naka tòókuan hěéthěé méé i gatu goa hāa, témé.

Qāè-tcaoa-máákuan hěé naka còrèan hěéthěé e

³Tíí qōe ga tuè, ncěe i ko ma qaase khama méé xae wèè x'aè ka gatu domka Nqari ba qāè-tcaoa máás gúú si i, gatu di dtcòma ne ko kaisase càuse, i ko gataga gatu ka c'ěem wèém koe tu úúa hāa ncàmkuan thěé kai khama. ⁴Gaa domka xae ko Nqarim di zi kereke zi koe gatu di qarika tééan ka hěé naka dtcòmān ka hěéthěé dqòmse, ncěe tu ko xgàraku zi hěé naka xháé zi ncěe kúrúse cgae tua hāa zi hěéthěé koe x'áía hāa a.

⁵Wèè zi ncěe zia ko Nqarim di xgàrakua ne tchàno o sa x'áí, tu gha gazi domka Nqarim di x'aian kg'anoa hāa, ncěe tu gaan domka xgàrasea hāa a. ⁶Nqari ba tchàno Me e, a ba a gha gane èe xgàra tua hāa ne thěé xgàra. ⁷A ba a gha gatu di xgàrasean koe sàakagu tu u, a sixae thěé sàakagu xae e. Ncěe sam gha kúrú, X'aigam Jesom gha Gam di xu moengele xu qari xu goa nqarikg'ai koe guu a hàà ka. ⁸Karùkom c'eem cgoam gha hàà, a hàà gane èe Nqari ba ko xguì ne hěé naka gane èe gatá dim X'aigam Jesom di qāè tchōàn komsana tama ne hěéthěé xgàra. ⁹Ne gha chōò tamase tòm-tommè, a gha Nqarim cookg'ai koe hěé naka Gam di qarian di x'áàn hěéthěé koe tçg'òòè, ¹⁰ěem gha ko hàà, a hàà Gam di ne tcom-tcomsa ne ka kaikaguè, a ba a thěé wèè ne dtcòm-kg'ao ne ka dqòmēm cām ka. **Tu gha gatu igaba gane xg'aeku koe hāa**, èe xae ko gatu koe nxàea tseegukagus tchōà sa tu kò komsana khama.

¹¹Ncěes noosega xae ko wèè x'aè ka còrèa máá tu u, gatá dim Nqarim gha kúrú tu u, tu Gam dis tciiku sa kg'anoa hāa tu khòè tu ii ka, a wèès gúús tcáóa tu t'ěea hāa sa hěé naka èe tu ko kúrú tsééan dtcòmān di hěéthěé Gam di qarian ka xg'ara-xg'ara ka. ¹²Gataga xae ko còrè, nxāasega i gha gatá dim X'aigam Jesom di cg'òèan gatu koe x'áákaguè ka, tu gha gatu igaba thěé Gam koe x'áákaguè, gatá dim Nqari ba hěé naka X'aigam Jeso Krete ba hěéthěé tsara di cgòmkuan koe guu a.

a 1:1 *Silefano* - Silefanom di c'ěe cg'òèa nea Silase e.

Krestem di hààn ka (2)

X'áèan komsana tamam khòè ba

2 ¹Ncéeska gatá dim X'aigam Jeso Krestem di hààn ka hěé naka gatá di xg'aeàn hàà ta gha xg'ae cgoa Me di ka hěéthěé e: dtcàrà tu u xae ko, tí qōe ga tuè, ²táá méé tu tc'ěea tu koe thamkase ntcāa-ntcāe kana arekaguè guu, porofitan ka, kana xàà zi ka, kana tcgāya zi ncēe ga c'ěedaoka sixae koe guua hāa zi kaga igaba, ncēe ko máá, X'aigam dim cáím ba nxāakamaga hààraa, témé zi. ³Táá hěé naka i cúí khòè ga c'ěem dàòm kaga qàe-qae tu u guu. Eēm cáím ba cuiskaga hààraa hāa tite ke, si gha nxāakg'aiga síí ntcoeku sa hàà, me gha x'áèan komsana tamam khòè ba x'áise, khòèm kaàkaguè gha ba. ⁴Ncēe ba gha wèés gúús ēe ko Nqarim ka tciise sa kana ko dqòmme sa ncoe, a gaas tc'amkg'ai koe kaikaguse. A ba a gha Nqarim dim tempelem koe tcāà a ntcōó, a gabá Nqari me e sa khòè ne bírí.

⁵Tc'ěe-tc'ěese tama tu gáé hāa, ēer kò gatu cgoa hāa kar kòo ncēe zi gúú zi ka bírí tu u sa? ⁶Tu ncéeska q'ana hāa, dùús xgàèa tòó mea hāa sa, nxāasegam gha hàà gam di x'áèan ka x'áise ka. ⁷X'áèan komsana tama di chómsea hāa qaria ne ko ncéeska tséé khama, me gha gaam ēe kò xgàèa tòó o ba qanega gatà hěé, a gha nxāakg'aiga síí dàòm koe tcg'òòè. ⁸Me gha nxāaska ēe x'áèan komsana tama ba hàà x'áise, ncēm gha X'aigam Jeso ba kg'ám q'ooa ba di sònò-q'ooan cgoa dqòma cg'òo, a Gam di x'áàko hààn cgoa cg'òo ba. ⁹Eē **x'áèan úú tama** ba gha satanam di qarian cgoa hàà, a ba a gha kàan di qarian hěé naka x'ái zi hěé naka are-aresa zi gúú zi hěéthěé kúrú, ¹⁰a gha wèè kàakuan cg'āè tséékagu, ncēe gha gane ēe aagusea hāa ne hòakagu u. **Aaguse ne gha**, tseeguan ncàm ne ko xguì khama, ncēe gha kgoara ne e. ¹¹Gaa domkam gha Nqari ba qarís tséés dàòm koe ko tcg'òó ne sa gane koe tsééa úú, nxāasega ne gha tshúú-ntcōan dtcòm ka, ¹²nxāasega ne gha wèéa ne ēe tseeguan dtcòm tama, igaba ko ēe tchàno tamas ka qāè-tcaokaguè ne xgàràè ka.

Qarika tu téé

¹³Igaba méé xae, tí qōe ga tuè, chòò tamase wèè x'aè ka gatu domka Nqari ba qāè-tcoa máá, gatu ncēe X'aigam ka ncàmmeà tu, tshoa-tshoases koe gam kò Nqari ba guu a nxárá tcg'òó tua khama, kgoaraè tu gha ka. Nqari ba kòo tc'ěe, Tc'ěe ba gha tcom-tcomsakagu tu u, tu tseeguan koe dtcòm sa. ¹⁴Me kò ēe xae **kò xгаа-xгаа tu u** qāè tchōàn cgoa ncēes gúús koe tciia óá tu u, nxāasega tu gha gatá dim X'aigam Jeso Krestem di x'áàn q'òò ka. ¹⁵Ke tu ncéeska, tí qōe ga tuè, qarika téé, naka ēe xae kòo kg'ámá xae cgoa xгаа-xгаа tu u zi cau zi hěé, naka ēe xae kòo góá máá tu u sa hěéthěé qgóóa qari.

¹⁶Nqarim gatá ka Xòò ba ncàm taa hãa, a Gam di cgòmkuan koe guu a chòò tama thòò-xama-máákuan máà taa hãa, a qãès nqòò sa máà taa. Gabá hěe naka gatá dim X'aigam Jeso Kreste ba hěéthěe tsara mée tsara ¹⁷tcáóa tu ghui-ghui, naka qari-qari tu u, nxãasega tu gha wèe qãè tséean hěe naka wèe qãè kg'uiian koe hěéthěe hãa ka.

Paulo ba ko dtcòm-kg'ao ne dtcàrà, kg'òèa ne ne gha tsééa máá sa (3)

Còrèa máá xae e

3 ¹Còò dis ka, tí qõe ga tuè, còrèa máá xae e, nakam gha nxãasega X'aigam dim kg'ui ba qháése qòò naka tcommè, èe i kò gatu ka ii khamaga ma. ²Khòèan ncèe cg'àè tc'èe koe còrèa máá xae e, naka xae gha qãè qgái koe hãa. Wèém khòè ba dtcòmà hãas tama si i ke.

³Igabagam X'aiga ba tcom-tcomsa Me e, a ba a gha qari-qari tu u, a èe cg'àè tc'èe iim koe kòre tu u. ⁴Nqarim koe xae tcoman úú hãa gatu ka, èe xae kò x'áè tu u zì gúú zì tu ko kúrú, a tu a gha qanega kúrú zì di i. ⁵X'aiga ba méém gatu di tcáóan Nqarim di ncàmkuan koe hěe naka Krestem di qarika téean koe hěéthěe tcéèa úú.

Kg'òèa tu tu tsééa máá

⁶Tí qõe ga tuè, gatá dim X'aigam Jeso Krestem dim cg'òèm koe xae ko x'áè tu u, wèém dtcòm-kg'aom èe kg'òès koe kg'amka ii, a èe xae kò máa mea hãa xgaa-xgaan komsana tamam koe mée tu tééa dìbi sa. ⁷Gatu igaba tu q'ana hãa, nta mée tu ma serè xae e sa ke. Gatu cgoa xae ko hãa ka xae kò kg'amka tama. ⁸Gataga xae c'èem khòèm di tc'òoan ga suruta me tamase tc'òó ta ga hãa, igaba xae kò ntcùú ba hěe naka koaba ba hěéthěe qarika tséé, a ko khùbu, táá xae gha díim ga ba qóm ba qgóókagu ka. ⁹Ncèes gúú sa xae kúrú hãa, èeta ii hùian xae gha qaa di qarian xae úú tama domka tamase, igaba xae kò máàse tu u kg'oana, nxãasegas gha x'ái sa ii ka, serè tu gha sa. ¹⁰Eè xae ko gatu cgoa hãa ka xae kò ncèe x'áèan máà tua hãa, a máá: “Ncèè c'èem khòèm kò tséé tc'èe tama nem tc'òó tite,” témé khama.

¹¹**Ncèes gúú sa xae ko góá**, gatu ka c'èe ne kg'òès koe kg'amka ne e, a tséean kúrú tama, a c'èe khòèan di tséean koe tcana tēe, sa xae kóma hãa domka. ¹²X'aigam Jeso Krestem **di cg'òèan** koe xae ko ncèe ne khòè ne x'áèan máà, a ko bìrí ne a ko máá, nqoo-nqoosase mée ne tséean kúrú, naka nea kg'òèkaguse, témé.

¹³Igaba gatu, tí qõe ga tuè, táá mée tu qãèan kúrú ka xhòe guu. ¹⁴Ncèè c'èem khòèm kò ncèes tcgāyas koe xae ko nxàe sa dtcòm tama ne mée tu èem khòè ba qãèse bóò naka tcg'oaragu, nakam gha nxãasega saucgae.

¹⁵Táá hòrea tu hãam khòem khama ma qgóó me guu, igabaga méé tu gatu ka qõesem khama ma tchàno-tchano me.

Cò di zi tsgámkaguku zi

¹⁶X'aigam tòókuan di ba méém wèé x'aè ka Gam ka tòókuan máà tu u, wèé dàò-kg'áman cgoa. X'aiga ba méém gatu cgoa hãa.

¹⁷Tíí Paulo ra ko ncëe tsgámkagukuan tshàua te cgoa góá máá tu u. Ncëe sa wèés tsgāyas *tiris* koe x'ái si i, ra ko ma góá ga a.

¹⁸Gatá dim X'aigam Jeso Krestem di cgómkuan méé i gatu wèé tu cgoa hãa.